

rocher inégal, qui fert & de table & de siege & de lict, de chambre & de cuisine, de caue & de grenier, de Chapelle & de tout. En vn mot on y mene vne vie où on apprend bien toft que la Nature se contente de peu: & s'il faut quitter sa maison en quelque lieu qu'on aille, il se trouue qu'on n'a rien perdu, & qu'en moins d'une demie heure on s'est basti vn logement entier.

Les Peres commencerent leur instruction par les principaux Capitaines, *sed non hos elegit Dominus*; mais Dieu ne [130] commence pas ses ouurages par ce qui éclate le plus. Il faut qu'une pauvre vieille aueugle l'emporte, & reçoive toute la premiere les benedictions qui decoulent du Ciel. La grace s'empara de son cœur & changea bien toft la nature: c'estoit vn esprit orgueilleux & plein de raillerie, qui se mocquoit des choses de la Foy. Dieu ne l'eut pas si toft touchée qu'elle ne fust plus ce qu'elle estoit; ses paroles ne sont que douceur, elle respecte nos mysteres, elle fouhaite le Baptesme; enfin l'ayant receu, & se voyant dans le bon-heur des enfans de Dieu, elle ne songe qu'au Ciel. C'estoit vn plaisir, disent nos Peres, de la voir le iour qu'elle venoit pour estre baptisée, par vn temps assez rude, par vn chemin de roches où elle s'égaroit à cause de son aueuglemēt, & où sans doute elle eust perdu courage, si sa ferueur ne luy eust rendu ces peines agreables, & ces égaremens pleins d'amour.

Vne femme infidele en trauail d'enfant estoit depuis deux iours dans le desespoir de la vie. Les Medecins ou plutôt les Sorciers du païs ayans épuisé tout [131] leur art, & iugeans que la mere & l'enfant n'en pourroient reschaper, vinrent trouuer nos Peres.